

## Allannguutissatut siunnersuut

## Uunga

**Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat**

Aappassaaneerlugu suliarineqarneranut Naalakkersuisunit saqqummiunneqartoq.

**§ 1-imut**

1. Nutaatut nr. 12-itut ilanngunneqassaaq:

”12. § 86, imm. 4, imatut oqaasertalerneqassaaq:

*Imm. 4.* Akileraarutit iluanaarutisianit tamarmiusunit naatsorsorneqassapput. Taamaattorli selskabi, aatsitassat pillugit ingerlatallu tamatumunnga pingaarutillit pillugit Inatsisartut inatsisaat naapertorlugu misissueqqaarnissamut, misissuinissamut imaluunniit piaanissamut akuersissummik nalunaarfigineqarsimasoq, akileraarutissanik naatsorsuinermi, selskabip iluanaarutisianik agguaassaasa akileraarusersorneqartut, selskabip iluanaarutininik agguaassat ilanngaatigitinnagit akileraaruteqaataasussanik sinneqartoorutaannit, amerlanerussutaat ilanngaatigisinnaavaat.

Oqaaseqatigiit aappaanni taaneqartunik ilanngaatit aningaasarsianit akileraarutit pillugit inatsimmi § 27, imm. 1 naapertorlugu aningaasarsianik akileraaruteqaataasussanik naatsorsuinermi ilanngaatigineqarsinnaanngillat.”

Siunnersuummut nassuiaatit

**Nalinginnaasumik nassuiaatit**

Aningaasarsianit akileraarutit pillugit inatsimmi § 36 c-mi malittarisassat, selskabit nunani allamiunit suliffeqarfissuarnit pigineqartut maaniittut, akiitsut namminerisanillu aningaasaatit naleqqutinnginnerisa (amigartunik aningaasaliinerup) kingunerisaanik, Kalaallit Nunaanni naleqqutinngitsumik ernianik ilanngaateqarnikkut, akileraarutissat Kalaallit Nunaanniit nunanut allanut nuunneqartarnerannut pinngitsoortitsiniutaasumik aalajangersagaapput. Malittarisassap nassataraa, selskabiutigineqartut amigartumik aningaasaliiffigisaasut ernianik aningaasaniillu atukkat nalingisa annaasaqaataanerannik ilanngaateqarsinnaanerannik ilanngarterineq, selskabiutigineqartup akiitsuusa namminerisanillu aningaasaataara sanilliunneranni uki-up aningaasarsiorfiusup naanerani annertussutsimit 2:1-imit annertunerusumik nikingappata. Malittarisassaq selskabinut kalaaliinnarnit pigineqartutut aqqissuussaasunut atuutinngilaq.

Malittarisassaq aatsitassarsiornermut atatillugu nunanit allanit annertuumik aningaasaliisarnerit ilaannut atatillugu sunnuteqarluartussaavoq, nunani allamiut piginnittuusut malittarisassap kingunerisaanik selskabiutigisap sulilernissaanut piareersaatinut atatillugu aningaasat atorner-

qartussat minnerpaamik 1/3-iinik aningaasaliiniartussanngussammata. Assersuutigalugu aningaasaliissutit katillugit 3 mia. koruuniuppata, piginnittuusut minnerpaamik 1 mia. koruuninik aningaasalissuteqarniarsarissapput, sinnerilu assersuutigalugu aningaasanik ernialersorlugit attartukkatigut aningaasaliiffigineqarlutik. Piginnittuusut aningaasaliissutaat tunngaviusumik malittarisassaasutut, Kalaallit Nunaata avataani aningaasarsiaasunit pinngortuussallutik.

Iluaqutiginninniarluni ingerlatsinerit ingerlaneranni Kalaallit Nunaanni selskabiutaasuni sineqartooruteqaleriartornerat iluatigalugu aningaasanik attartukkat namminerisanillu aningaasaatigisat assigiinngissuseqarnerat allannguuteqassaaq namminerisanillu aningaasaatit anner-tusissallutik. Niuernerpalaartumik ingerlatsineq eqqarsaatigalugu namminerisanik aningaasaateqarnerup qaffasinnera tamatigut iluaqutaaneq ajorpoq. Pisut ilaanni iluaqutaasassaaq selskabiutigisap namminerisamik aningaasaataanik, sulianut allanut aningaasaliinissaq siunertaralugu ikilisaanissaq, assersuutigalugu aatsitassanik allanik iluaqutiginninniarnissamut atorlugit. Selskabip namminerisanik aningaasaatai ilaatigut iluanaarutisianik agguaassinissamik aalajangernermut ilaatillugu ikilisaavigineqarsinnaapput.

Aningaasarsianit akileraarutit pillugit inatsimmi § 86, imm. 2 malillugu suulluunniit aktiaatilinnut iluanaarutitut pisassanngortinneqartut tamarmik iluanaarutisiatut isigineqarput, aktialli akilersinnagit aktiaatilinnut tunniunneqartut aammalu akiliisinnaajunnaarnermi pigisat aningaasannorlugit naatsorsorneranni iluanaarutit pinnagit. Maannakkut killiffigisami, aatsitassalerinermi ineriartortitsinerimut aningaasaliissutit amerlanersaat nunami allamiut aningaasaataannit pisuutillugit, aningaasaliisuusunut nammaginangitsorinarsinnaavoq, aningaasat, soorlu ilaatigut § 36 c-mi malittarisassap kingunerisaanik, Kalaallit Nunaanni selskabiutigisamut aningaasaliinertigut pinngortut, iluanaarutisianit akileraaruteqartitaanissaat. Pissutsit taamaattut aningaasaliisut Kalaallit Nunaanni aatsitassanik misissueqqaarnissamik, misissuinissamik piaanissamilluunniit aallartitsinissanik soqutiginninnerannik millisaataasinnaanissaat ilimagineqarsinnaassaaq.

Allannguutissatut siunnersuutip siunertaraa selskabit aatsitassalerinermik ingerlataqartut aningaasaliissutaasa iluanaarutisianit akileraarutininik akiliissutaasanninnissaat.

Maannakkut ilisimasat tunngavigalugit siunnersuutip aningaasatigut kingunerisassai eqqoriarneqarsinnaanngillat, ataatsimulli isiginnilluni naatsorsuutigisariaqarpoq Kalaallit Nunaanni aatsitassanik misissueqqaarnernut, misissuinernut imaluunniit piaanernut aningaasaliissutit amerleriarsinnaanerisa kingunerisaannik, iluanaarutaasumik kinguneqarnissaa

### **Aalajangersakkanut ataasiakkaanut nassuiaatit**

*Nr. 1-imut*

Siunnersuutigineqarpoq iluanaarutisianit akileraarutit naatsorsorneqartassasut aalaaviusumik iluanaarutisiat tamarmiusunit, tassalu ilanngaatitaqartinnagit.

Siunnersuutigineqassaarli selskabip aatsitassat pillugit ingerlatallu tamatumunnga pingaarutilit pillugit Inatsisartut inatsisaat naapertorlugu misissueqqaarnermut, misissuinermut imaluunniit piiaanissamut akuersissummik nalunaarfigineqarsimasup, iluanaarutisiat agguaanneqartut akileraarusersorneqartullu ilanngaatigitinnagit selskabip akileraaruteqaataasussanik sinneqartoorutaannit annertunerusumik iluanaarutitik agguaassanit, amerlanerussutaasut akileraarutit naatsorsorneranni ilanngaatigisinnaassagaat.

Aalajangersakkap nassataraa, selskabi iluanaarutisiaqartitsisuusoq ukiumi aningaasarsiorfiusumi akileraaruteqaataasussanik iluanaarutisianik agguaassat ilanngaatigitinnagit ukiumi atuugaasumi siusinnerusunilu sinneqartoorutitik tamarmiusunik naatsorsuusiornissaa, tamakkualu ukiumi atuuttumi siusinnerusukkullu iluanaarutisianik agguaassanut (ilanngaatitaqartinnagit) akileraarusersorneqartunut sanilliutissallugit. Iluanaarutisiat katinneri sinneqartoorutit katinnerannit amerlaneruppata, aningaasat amerlanerussutaasut iluanaarutisianit akileraarutissat naatsorsorneranni ilanngaatigineqarsinnaapput. Ilanngaat, ukiumi aningaasarsiorfiusumi, iluanaarutisiat tunni-unneqarnissaannik aalajangiiffiusumi, iluanaarutisianit akileraarutit naatsorsorneqarnerani atorneqassaaq.

Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi § 17 aamma § 18 malillugit selskabit naatsorsuutaanni sinneqartoorutit tamarmiusut iluanaarutisiallu tamarmiusut pillugit sukumiisumik nalunaarsuutit pillugit erseqqinnerusumik malittarisassanik Naalakkersuisut aalajangersaasinnaapput, pissutsit tamanna pisariaqartilissagaluarpassuk.

Siunnersuutigineqarpoq ilanngaatit, oqaaseqatigiit siulliit tulliini taaneqartut, aningaasarsiat akileraaruteqaataasussat naatsorsorneqarneranni ilanngaatigineqarsinnaassanngitsut, takuuk aningaasarsianit akileraarutit pillugit inatsimmi § 27, imm. 1.

Allannguutissatut siunnersuutip nassatarisaanik allannguneq pineqarpoq.